

Kebun komuniti 'benteng awal' hadapi ketidaktentuan global

Kuala Lumpur: Inisiatif kebun komuniti di kawasan bandar dilihat berpotensi menjadi 'benteng awal' dalam memperkukuh keterjaminan makanan negara, khususnya bagi mendepani cabaran ketidaktentuan bekalan akibat krisis tenaga global.

Timbalan Pengarah (Pengembangan Pertanian) Pusat Transformasi Komuniti Universiti, Universiti Putra Malaysia (UPM) Prof Dr Norsida Man, berkata program seperti Kebuniti MADANI berperanan sebagai lapisan keselamatan makanan yang strategik pada peringkat akar umbi.

Beliau mencadangkan inisiatif itu diperluas kepada skala

lebih besar dengan memanfaatkan kaedah pertanian moden seperti hidroponik dan sistem fertigasi, khususnya di kawasan bandar.

"Inisiatif ini boleh diperkasa dengan mewujudkan kebun berskala lebih besar menggunakan tanah kosong di kawasan perumahan, termasuk Projek Perumahan Rakyat (PPR), selain di kawasan sekolah, masjid dan sebagainya.

"Pada masa sama, latihan serta pendidikan berkaitan pertanian bandar perlu diperluas bagi me-



Norsida Man

ningkatkan kemahiran komuniti," katanya ketika mengulas potensi kebun komuniti sebagai pendekatan mampan dalam memperkukuh keterjaminan makanan negara.

Dalam pada itu, Norsida berkata, Kebuniti MADANI juga berupaya menjadi pemangkin ekonomi setempat melalui penjaan pendapatan daripada jualan lebihan hasil tuaian.

Katanya, model ekonomi komuniti boleh diperkasa melalui pembentukan koperasi atau pu-

sat jualan setempat bagi memastikan pengurusan hasil pertanian lebih sistematik dan tersusun.

"Tanaman yang sesuai di kebun komuniti ialah tanaman cepat dituai dan mudah diurus seperti sayur-sayuran serta buah-buahan, selain tanaman jangka pendek seperti pokok tin, limau purut dan limau kasturi," katanya.

Timbalan Presiden Persatuan Agroekologi Malaysia (SRI-Mas), Dr Anni Mitin, berkata usaha memperkukuh kebun komuniti perlu dilaksanakan secara menyeluruh dalam kerangka sistem makanan lebih tersusun.

Katanya, aspek pengeluaran

benih tempatan melalui kaedah simpanan dan pertukaran perlu diberi perhatian, selain penghasilan baja semula jadi bagi mengurangkan kebergantungan kepada input luar serta mengelakkan pencemaran racun.

Beliau berkata, perancangan dasar dan bandar juga perlu menyokong konsep kejiranan hijau dengan menyediakan kawasan atau ruang awam hijau dalam pembangunan perumahan.

"Di negara maju, seperti Austria, terdapat kawasan khas di bandar yang diperuntuk atau boleh disewa untuk pertanian komuniti secara jangka panjang," katanya.

BERNAMA